

四明叢書

張宗祥



續騷堂集

四明張氏約園開雕

序

壽鏞蒐輯鄉書於吾鄞萬氏三致意焉丙子春旣瞻謁
白雲莊越歲萬布衣祠成集鄉人而落之壽鏞先爲之
記更展拜其墓時萬氏後裔有自杭來者二人焉皆誠
篤君子也客更詢壽鏞所得萬氏書告以實羣歎十世
勲績與七代文章相輝映異日儻彙合之爲萬氏家集
豈不偉哉壽鏞唯唯攷萬氏自鹿園先生承四忠三節
一義之後開文章節義理學經學史學之先其子達甫
字仲章有皆非集孫邦季字瑞巖有一枝軒吟皆詩也

更得續騷堂集爲悔庵先生作先生嗣音一枝而啓牖
八龍者也亦越四世矣益之以充宗允誠季野兄弟爲
五世管邨授一爲六世開遠爲七世此就著述流傳者
言之若其人足爲世法而其書無可攷者更多卽如斯
集依會稽孫氏德祖序言第一葉截兩行當集名一行
作者名氏一行楷則端嚴隱秀當是先生眞蹟自敘所
云手錄存之者不敢示人蓋固隱晦聽之天焉然續騷
堂集李杲堂序之履安先生詩黃梨洲序之且曰今續
騷堂寒松齋粵草皆遭亂以來之作也徵諸全謝山續

甬上耆舊詩選萬戶部詩凡三百九十二首始之以斯
集終之以粵草其中閒則爲寒松可知也又攷懷剡詩
自題見續甬上耆舊詩丙戌之歲避亂剡曲山中去郡城百五

十里而遙溪山幽邃有終焉之志三年以來憂患洊至
死喪之餘繼以兵燹過返故里今六更寒暑矣所謂三
年以來卽先生斯集自序始於丙戌終于庚寅者是也
又攷重葺寒松齋卽事詩云剡曲歸來理故園空山猶
是未招魂是卽充宗撰行狀云所居寒松齋二三友朋
香茗坐對嘯詠忘飢亦卽懷剡詩自題今六更寒暑時

也迨至丙申夏客粵東迄丁酉十月六日沒則又爲粵
草六十首所由作更徵諸充宗所謂續騷堂稿凡若干
卷懷剡詩一卷粵草一卷又適合矣今雖寒松閣集三
卷未見而謝山所選秩然有序意者續騷爲一卷寒松
爲一卷粵草爲一卷乎概稱之寒松閣集據後名之也
嗚呼自甲申迄丁酉十四年中先生義聲震天下所不
可奪者大節耳束身頽垣破壁之下續秋望自題寄跡儒衣
僧帽之間哭董晉公詩僧帽儒衣讀道書心病難醫世亂誰恤卽景生
情呻吟澤畔旣哭亡友更救良朋情之所至縱蛇漢水

釋狼中山景堂謂之曾不自悔者而晚號悔庵雖悔之
而人知先生之失於厚固無損於君子人也歟刻既竣
因書於端時民國二十九年九月後學張壽鏞

鄞縣志本傳

萬泰字履安晚號悔庵邦孚子崇禎九年舉人自爲諸生卽偕同邑陸符從學劉宗周毅然以名節自任時黨部正分浙人不與復社相通泰首拉符應之諸名士無不倒屣以迎會有保舉之詔當道欲以泰應讓之符時稱其義符性剛於世閒嵬瑣之士叱之若狗泰稍和易然自一揖外交一語其人多惶恐退去泰嘗與無錫顧仁杲吳縣楊廷樞蕪湖沈士柱餘姚黃宗羲聚講南京惡阮大鍼甚作留都防亂揭逐之東江建國以戶部

主事司兵餉充日講國亡遁入榆林已而榆林亦被兵
乃復歸公車敦促長歌謝之然日益忽忽不自得燕人
梁以樟至鄞約同志六七人與之倡和其音淒絕吳鍾
嚮死泰購得其遺稿摩挲故紙手鈔傳之泰始未嘗作
詩遭亂以來驚離弔往所至之地必拾其遺事表其逸
民宗義謂泰詩爲詩史孔子所不刪也其推重如此生
平最重倫理女兄弟五人所適皆貧泰有無其之給其
終身高斗樞李桐父子蒙難泰與大將之記室有舊聞
之憾然曰吾不出獄不解也爲至會城以奇計出之桐

死杭州泰以其喪歸晚游粵東返棹有同年生毛汧染疫將死同舟皆欲棄之泰獨收視親其藥裹汧得生而泰病卒年六十子八人斯年斯程斯禎斯昌斯選斯大斯備斯同

攷定續騷堂集敘

甲申九月旣望余與馮君舸月集趙氏翰香居主人瑾伯戶部出所藏寫本古今體詩一冊屬爲攷定凡詩三百十首第一葉截去兩行當集名一行作者名氏一行有自敘凡兩葉又六行文氣未竟當連屬歲月名氏亦截去大抵寄感滄桑或以鼎革之際疑有所諱故也乃相與雘誦一過主客往復討論定爲鄞萬履安先生續騷堂集蓋先生爲鹿園居士曾孫鹿園葬錢唐歐家山自敘云西渡錢塘掃先入墓其證一先生與同縣陸符文

虎並爲梨洲黃氏所兄事梨洲謂文虎死後先生始爲詩而自敘亦云文虎早以詩古文詞名世心慕之而未
能學文虎以憂瘁死不平思鳴始有意于學詩其證二
集中七歌之二章有曰我生之初在帝城吾父秉鉞方
東征攷先生生于萬厯戊戌而先德瑞岩都督實以其
年爲游擊將軍師鴨綠江主征倭之餉其證三梨洲志
先生墓云先生不受公車之徵遁迹榆林喪其夫人已
又喪其太夫人自敘亦云乙丙以來崎嶇逃死哭妻于
矛頭刃底壘土未乾彼蒼降割恨與天終其證四至若

先生所著寒松齋集凡三卷著錄聞蕊泉氏鄞志黎洲敘先生詩與續騷堂粵草兩集並稱謂皆遭亂以來之作是集旣未釐卷次而自敘時把離騷向水邊林下讀之之語殆續騷所由名堂而是集之爲續騷堂集可以不疑矣夫以萬氏之繁葉勳舊固與明室同其休戚而先生流離瑣尾不皇自卹唯是惓懷故國纏綿蘊結一寓于詩慟黍離于行邁悲天命之不淹歌以當哭怨而不排風人之遺略可睹矣楷則端嚴隱秀當是先生真蹟自敘所云手錄存之者尤可寶貴也大清光緒十年

水馬堂集

會稽孫德祖彥清謹書

約園刊本

讀萬悔庵先生續騷堂詩集

閨運蹙海東明社旣云屋日把離騷經一讀還一哭國
破家亦亡何處歸邦族告密飛章名不麗狂生六行歌
賦黍離隱遁榆林谷猛犬吠狺狺孤臣悲放逐白雲縱
鷓鴣傾身救巢覆生友黎洲黃死友文虎陸決絕博士
徵奚煩詹尹卜感喟舊神州誰上徐陵牘中山悔釋狼
眾喙任誘譁顛顛此湘纍鬱伊載其腹心死出哀吟炊
斷啓詩軸慙懷楚些辭三閭存面目淪河風氣開名士
老而禿繼雅三百篇藉作風詩讀孔子所不刪詩史良

見獨埋山沈井中終古必傳作湘水弔無知血淚紛滲
漉先生魂歸來寒松風謖謖光緒甲申冬十二月慈谿
末學楊泰亨謹題